

北京日報

第二百零一册

代表人朱 淇

論 說

二月十六日

訓蒙改良說

徐士佳來稿

方今輪電交通重洋無阻始悉東西洋各國其民人無不知自治無不知愛國亦無不知結團而以富強其國於是士農工商各精其所業以與世界相競爭由於通國男女無人不學無人不閱報看書故號為文明而目吾國為野蠻為病夫為必亡之國斯言也吾國人聞之初猶未肯遽信及見彼之各業發達日就膨脹而回視吾國則男子識字者十人而一焉能閱書報者百人而一焉能握筆為文及寫信者千人而一焉而女子更無論已此固民智之未開亦由教法之未善也吾國童子入塾先生教以方字繼則授以四書五經且教以朱註（按此等皆為科舉所誤然蒙學之中將來望科舉者十中之一何必以一人之故而誤九人耶）然而俟其出塾已十年八年矣此時試問其所讀之書能曉其大意否或能解其字句否則曰尚未開講也若令改就農與工商即寫信閱報而猶未能直與未讀者相去不遠甚且有所識冷僻之字終身不用者則此十年八年難得之光陰與不易措之費用不幾幾浪擲矣乎此不得不謂舊法之誤人也近來吾國志士見外國之日盛而擬將吾國教法改良無非求其字少期短字字明白大約一二年之功千餘个之字無論如何愚人必能通曉及二年出塾改為農商即能閱報寫信成效反勝於十年八年之舊法予聞而避之去年二月吾孫女九歲長孫七歲請次甥王篆香用新法教以方字每日十餘箇講而後授以次日還講不誤為度凡數月識字近千乃教以蒙學歷史地理各教科書皆明白曉暢且各欣欣有喜色與舊時學生之視讀書為畏途者迥別計至今年正月為時僅及一年而凡白話之報與淺近之說部皆能自閱矣若使以舊法為教恐十年之功未必能獲此實用也如以此所學或改習農工與商直可以終身用之矣然計其就塾之時只有一年耳即有天才稍笨者不過二年極遲則三年必可畢業矣世之為師者若皆用新法則十年以後吾國亦無不識字之人可斷言也敬告普天下塾師速即改圖俾貧寒子弟早收讀書之實效而識字之人可普及於全國廣開衣食之源漸收富強之效豈非吾國前途之幸福哉予日望之矣按近來各處教案多有愚民暴動之事論者每歸咎於民風强悍及游民太多之故實則皆由不識字而起如一村之

中識字者能居多數則萬無此患然則多立蒙學即弭亂之妙法亦富強之至計也法當先從游民最多之處下手徐及其餘若將教案一次之賠款以立蒙學已足千數百區（每區百元足矣）此治本之上策亦何憚而不為是在地方之賢令尹矣

要緊新聞

教士戕害詳細情形彙誌○南昌教士戕害縣官本報迭據電報登載十六誌矣茲接南昌訪事專函查訪肇釁情形較為詳細事關重要不厭求詳特將訪函彙錄如下 南昌縣江召棠大令於二十九日夜八句鐘時在松栢巷天主堂因議新昌教案被法教士行刺未死穿喉喉管各等情已詳前信探聞未經行刺之先法人勒逼江令書叙自刎情事以為事後脫卸之據然宴會之際將江令隨從人等屏諸門外閉戶密談并同席者除江令外祇三法人其中隱情已可概見如此欺藐中國已極一時人心公憤舉國若狂當道恐無識流民布散謠言滋鬧事故因亟明白曉諭并飭警察各員嚴加防範除電告外部兩江之外并電各省督撫籌商辦法聞兩江督帥覆電須俟該行兇法人解署交涉司道等連日均在院會議江令籍隸安徽現在江南同鄉官亦共籌對付之策稟請中丞作主本月初三日江西全體學生在百花洲沈文肅公祠開會籌抵制之法先期備發傳單人心甚為團結 傳單云現本省天主教堂法人誘刺南昌縣江大令欺藐我國已達極點凡我同胞靡不心痛茲准於本月初三日十點鐘開特別大會於百花洲沈公祠無論官商工農學界請降臨以籌文明抵制挽回國權決不暴動致礙大局專此通知敬祈轉佈 正月二十九日南昌縣江召棠大令在天主教堂議辦新昌教案被法教士王安之刃傷頸際一時人心惶惶全體學生遍發傳單於初三日在百花洲沈公祠議籌文明抵制之策到者萬數人道路為之擁塞先由某某諸君登台演說擬以理法對付以伸國權而聽者人眾嘈雜任意哄鬧以致解散 十一點鐘時有鄉人數萬蜂擁入城至老貢院天主教堂放火焚燒將教士王安之擊死於三道橋并將進賢門外天主堂亦縱火焚燒見有洋人即加擊打又羅家塘之耶穌堂亦付一炬金教士受敵而死計燒教堂三處洋人男女大小共死九人地方文武前往救護者均被民衆攔阻並將右營游擊洪占魁頭顱打破一時聲勢汹汹一帶店舖居民門戶深閉其行為野蠻形同化外 撫台即會集司道馳電樞府代奏并電南北洋及各省督撫協商辦理 此次之禍禍禍各屬必派兵艦而來當軸巨公擬籌善法抵制以維大

局 撫台比又出示曉諭民人不可暴動並派武巡捕彈壓各民衆不服勸諭仍糾集圍困教堂 撫台告示照得南昌縣江令於上月二十九日在法國天主堂因從前棠浦莊港等處各舊教案與堂中神甫互相爭執該令氣忿致生此變有該令扶痛手書多紙可憑該令傷痕連日醫治可保無虞惟案情重要必應澈底根究秉公核辦本部院現已督同兩司據實電達外務部南北洋大臣一面特派緝獲兩道會同洋務局司道暨南昌府新建縣傳人提證悉心根鞠務得實在情形并候江令醫痊令其明白呈遞親供由本部院核明擬定辦法請 旨定奪事關國體本部院與司道等決不肯含糊了事貽患無窮爾紳士商民人等愛國同心本部院自能曲鑒惟願靜候官辦毋得誤聽傳言致失事實而滋藉口本部院忝撫是邦乃出此等罕聞之案其為愧憤較吾民為尤切也其各凜遵特示云云 撫台札飭各屬保護教堂文 為札飭嚴密保護事照得省垣痞棍流氓聚眾滋鬧有與天主教堂為難情事深恐訛言佈散各處無知愚民乘機煽惑所有省垣城廂內外及各府廳州縣各教堂教士教民亟應一律嚴密保護除分別札行并電飭遵照外合照札飭札到該處立即會同文武營汛一體嚴密保護慎勿稍滋事端致干重咎切切特札 外務部覆電 南昌撫台鑒電悉南昌縣江令在教堂被傷情節極重究係如何致傷應即嚴切根究希將現查情形迅速覆電 覆外務部印 省城各教堂洋人於初三常晚由官派輪委員一律護送出境 初三日亂民焚燒教堂三處並法吏學堂一所傷斃法國洋人六命英國洋人二命茲再詳述於下 初三日十一點鐘有痞棍流氓煽惑鄉愚云洋人殺官必圖報復一時聚集數萬人至老貢院放火焚燒法國天主教堂神甫王安之見勢兇急逃至荆波巷在紳士鄒凌瀚觀察家為亂民所知遂蜂擁入內肆行劫掠將王安之搜出衣服盡行剝去沿途毆擊棄於三道橋東湖內 天主堂焚燒後又至羅家塘將英國耶穌教堂亦放火燒去金教士夫婦二人均遭亂民擊斃滿面傷痕甚為慘狀尚有幼子約三四歲擊破額額公栢巷法文書學堂亦被亂民放火洋教習均已逃匿幸獲無恙 亂民等將城內教堂燒後復至進賢門外焚燬耶穌教堂內洋人為馬隊營保護未遭亂民之劫 又至進外十字街燒天主教堂內法人五人均投水而死美女教士花小姐在亂民之中為陸軍兵丁救出在陸營內金教士擊傷之幼子現送交花教士撫育醫治當時鬧事之際官兵彈壓均不服從 當晚即將各教堂洋人派輪委員一律護送至九江 撫台於三點鐘出轅督同司道府縣營汛察看各教堂被焚情形及洋人傷斃形狀計所斃洋人八人於初四日由南新兩縣傳照相各拍小照一紙并分別相驗置備棺木均衣中國禮服入殮撫台札飭司道府縣營汛重懲賞格查拏為首肇事之人盡法

處置在場搶劫物件之人亦一體訪拿懲辦現已由衛隊擊獲六人在撫院審鞫口供分別交南新兩縣收禁 省城
半步街廣潤門口之福音堂及德勝門外美國教堂醫院葆靈女書院均已分別派兵保護 撫台已將鬧事情形電
達外務部代奏并電南北洋大臣兩江周玉帥擬即來江查辦撫台有即日起帶迎接制台之說 撫台於鬧事後又出
簡明告示一道 江令一案 正在查辦 院司迭示 開導解散 乃有匪徒 糾集流氓 肆行焚殺 波及英
人 天主三堂 一概燬壞 不服彈壓 形同化外 事外洋人 殺斃多名 似此暴舉 從來未聞 諭爾良
民 各安生業 毋得附和 致遭殃孽 所有兇犯 嚴飭擊問 再滋事端 格殺勿論 南昌縣現委孟慶雲
大令代理於初三晚給扎旋即受篆 此函係初三初四等日由南昌寄來本館照原函全錄備紀此事原委
遼東木稅仍由我國徵收○東三省森林之利外人垂涎久矣從前本設有木植公司自中日訂約以來該木植公司有
合辦之約惟公司商業雖云中日合辦而木植之稅則仍由我國徵收尚未盡失利權云
奉天鹽務之交涉○奉天省之南如金海復等州縣皆有海灘可以煮鹽自旅順歸日本日人欲在此煮鹽運銷奉天全
省各內地趙次帥不允但旅順已歸日界日人在此煮鹽我國亦無權禁阻惟擬阻其運銷內地之舉並欲由華商收
回自運售於內地而已
奉吉鐵路擬歸紳辦○由奉天至吉林之鐵路已定議由中國自辦惟刻下尚未開手辦理聞將來此路已議定由吉林
奉天兩省紳民招股自行建築
黑龍江奏調人員○黑龍江程留守因江省辦理新政在在需人特具摺奏調六員俾資贊助聞奉有 硃批傳蘭泰
曹廣權因本衙門有要差無庸調往餘著照所請云云
請賞俄員寶星○吉林將軍達桂奏請給俄員寶星已奉 旨交外部議奏矣近日請賞給外人寶星者太多大有爛羊
頭關內侯之物議蓋賞太濫則人亦輕視之似不宜濫作人情也
黑龍江設立工藝廠○程留守在黑龍江開設工藝以養貧民已辦有頭緒並具奏到京矣
陝甘鐵路派大員管理○陝甘所辦之鐵路聞政府擬就近即派該處督撫升吉甫制軍及曹中丞督理其事云
戶部籌備軍機處津貼○戶部堂官奉到交片言軍機處津貼之款即由該部撥給現該部堂官已飭員籌備款項准於
本月十五六日移送軍機處矣

河南紳商稟請開埠○河南紳商近日集議稟請豫撫將確山附近之駐馬店並西華附近之扶溝焦橋二處開為通商
口岸云
戶部議將奉天昭信股票請獎截止○昭信股票之請獎各省多已截止惟奉天尚可請獎刻下戶部堂官擬將奉省昭
信股票請獎之事限至本年三月底亦一律截止以歸畫一云

本京新聞

黑省請設郵政局○政府前因黑龍江將軍咨商現在江省整頓庶務一切公文摺件最為緊要若僅由差撥人等投遞
往返需時且多遲阻難免無誤公之處擬請設立郵政局應如何設立章程即請大部速與郵政總局安定等語聞日
前已照會赫大臣訂期商辦云
工巡局春季甄別○日前內城工巡總局札飭各分局內開現屆本年春季甄別期各局即將警巡長捕平日當
差優劣及品行事宜並平日功過申送本局以憑核辦云
議擬派員考察警務○聞警部堂官議及各省巡警恐其辦理未能得法致多虛糜故事徒糜餉項擬即派員先赴江南
一帶考察警務並可指授辦法
電湘還甘肅購槍款○陝甘總督升允電戶部文為整頓甘省新軍增購器械向漢口德商瑞記洋行訂購砲彈共需款
六萬一千四百六十八兩六錢查湘省歲協餉十五萬兩請電湘撫由該協餉項下就近撥交德商以免轉折等因已
由戶部電湘撫查辦矣
安徽已設鐵路總局○安徽鐵路在京設局名曰安徽鐵路京局已於本月初九日在後孫公園開局辦事
郵政又添快信○聞郵政局又定新章(漢口)(武昌)(漢陽)三處亦設加快信件於日內通行
軍機甄別供事又聞○軍機處甄別供事聞其中有四等人無庸考試一得過獎敘者二兼他差者三不常到軍機者四
新到軍機者均無庸甄別
議飭照會通用銀幣○聞財政部王大臣會商現擬改定一律銀幣以便通行應咨外務部轉行照會各國使臣各埠領
事並飭知稅務司嗣後均應一體遵用至征收關稅向用關平應令稅務司按照商約仍以庫平折合關平核計征收

不得任意挑別

電告推廣放荒○聞黑龍江將軍程電致政府略 查巴拜荒段領戶聞風來集自應變通辦理挨次文放從此逐漸推廣可以直達省城則附郭各處荒蕪之地悉能變為良田等語

桑麻公司行將成立○職商趙文玉擬在滬設桑麻公司聞已購定地其刻期稟請商部註冊開辦矣

警部注意偵探○京師近日謠言蜂起誠恐有不法之徒藉端煽惑實於風俗人心有關現已由警部派員嚴密探察矣

各省新聞

擬購造槍機器○(江蘇)江督周玉帥注重槍械曾電飭李叔倫觀察購辦造槍機器茲由李觀察考核各國價目以英國槍機價為最合算當即電稟王帥略謂奉電諭飭購造槍機器遵即派李甫牧壽仁馳往德國各名廠考查一切核計羅維廠所售雙桿槍管鑽床每部價值英金一百七十九磅四桿槍管鑽床每部價值一百三十三磅十先令又徐特廠雙桿槍管鑽床每部價值三百五十磅四桿槍管鑽床每部價值二百磅均在亨伯地方交貨不肯包運上海職道因向英國各名廠詢問價值以韋得祿所開最廉計雙桿槍管鑽床每部價值二百二十五磅連鑽頭一打價值四十二磅在內四桿槍管鑽床每部價值六十六磅五先令連鑽頭二打價值一百一十一磅在內包運上海交貨該價分三期算給並據韋得祿面稱向在上海開設地亞士洋行與官商交易素有信實名譽職道再四磋商價值無可再減擬即訂立合同以紓慮除將會同底稿由郵局呈外先此電稟伏乞鈞裁示遵云

創設督練公所派員單○(浙江)浙撫張中丞諭飭司道創設督練公所派委各員分司執事復調會赴日本留學畢業之官費武備生為教練官茲將奉札各員銜名錄下 督練參謀兵備處總辦候補道(程恩培)兵備處提調候補府(三多)參謀處提調候補縣(李蔚)兵備處庶務兼收支候補縣(胡遠芬)教練處教育候補縣(張其昌)兵備軍營事務候補縣(萬宗林)兼辦督練處文案候補縣(鄒銘)參謀處文案兼收發候補縣丞(強運開)兵備處文案兼收發候補府經(楊繼忠)教練處文案兼收發候補縣丞(蔣福昌)委充副教練官南洋畢業生(陸殿奎)總教練官武備副管帶畢業生(徐方紹)副教練官畢業生(陳步棠)武備處與圖書兼石印事務畢業生(潘慶麟)

據公法以盡保商之責○(東三省)軍督部堂批營口商號裕盛長等稟云查國際公法貨幣一項本不在戰時禁制之列即日本海軍省第三條詞意亦甚明晰況有該國領事證明願書確認其非供給敵國軍用自應自主國詰問索還以盡保商之責仰候咨明外務部查照辦理可也

遊歷實缺員赴任○(湖北)上年鄂督曾遣實缺州縣赴日本遊歷考查各種要政回鄂之後鄂督面獎有加昨已由藩司牌飭慶春潘頌捷陳鈞紹輝徐培光等五員各赴本任並由鄂督飭令司道譙之於學務處以勵來者將來各員任事或能擺脫積習也

委員調查安溪礦產○(福建)福建興泉永道姚稷臣觀察到任後於學務商務認真整頓又以各屬礦產甚富非速行開採不能裕國利民日前特派委員前往安溪等處調查礦產切實踏勘回覆以便籌款舉辦

撤調嘉湖防營將領○(浙江)浙西幫匪雖於去冬防剿迭獲首要未能悉數殲除近又奉到 廷寄飭即嚴剿肅清毋任滋蔓等因當奉張帥查得嘉防統領吳家正本已革職未便久留即行撤退另調向統台防之王立堂副戎承代又湖防水陸各營改委雷庭瑞副戎接統并派武備畢業生數名隨往道用會同蘇省水陸各營分頭搜剿督撫飭併營務處改設學務處札文○(山西)為札飭事照得學務處為全省學務總匯之區自應設立專所以資綜理而責成前經札行司道擇地另設去後茲據面稱擬將該處移於現在營務處而以營務處併入軍裝局等情應即如所議辦理除分行外合亟札飭札到該司道即便遵照俟營務處騰出後速將學務處移於該處即以該司道為督辦所有該處經費及添派委員一應事宜仍遵前札事理會同妥議章程詳候核辦毋延此札

創辦鐵路儲蓄銀行○(湖南)粵漢鐵路自廢約贖路後湘路於三省為最長路工一千餘里須費幾二千萬兩湘紳擬仿泰西各國舉辦利公債其法分期募集析總額為最小股分於分利時取十分之三為特利用抽籤法定之便常利更有意外之獲以興起人人積儲之心日本勸業銀行即用此法發行債券湘中亦擬設一銀行公議酌定章程原本泰西之成規參取廣東之辦法給利於股外以利推行重銷票之酬以資獎勵凡農工力役勞動所獲皆入股一利一舉而數善備焉

團練將改歸商辦○(江蘇)江甘兩縣團練經費本係各業按月集捐自為保衛之意嗣因官諭紳辦致每月捐款約近一千串而所收效果殊屬淺薄且不免貽人口實疊經某紳在府稟計指為侵吞各節現在商會既已成立應由商

會總理自行公舉品端行潔之人妥為經理以免事出紛歧而致中飽云

各國新聞

西例須納爵稅○(英國)英皇贈日皇勳章乃尊貴之品向來外國受爵位者應納爵稅額按爵位均有一定之價值德國夫列蘇侯陞公爵時會上爵稅一千二百元卑士麥公爵及其公子因欲納爵稅其時極力告辭查應上爵稅之國以英國為貴聞南阿戰爭時有名大將羅巴元帥凱旋陸為伯爵得賜瓦他(譯音)勳章亦因納爵稅力辭後由宮內撥款代納又查英之男爵計納五百元公爵須四千元意大利西班牙葡萄牙等國其稅極貴如公爵須納二萬元惟法國乃守共和主義故無此例云(譯時事新聞)

俄訂議院章程○(俄國)德京電云俄國訂定議院章程議院有參訂刑律權衡凡刑律稿件均由議院核議並有參酌國家要政之權開議時盡許國人旁聽云

英皇與法總統會宴○(英國)路透電云英皇於西三月四號在駐英京法使署肆筵設席敦請法總統及法首相飲宴頗形歡洽云

日兵仍佔鐵嶺○(日本)上海太晤士報云目下鐵嶺仍被日軍佔據據云係欲彈壓土匪之故
法使因南昌案照會外部○(法國)法使照會外務部以南昌之亂實由地方官保護不力所致並向中國索取賠費並請極力保護旅居中國西人生命財產

法委決裂情形○(法)法國與委國交涉一事將有決裂之勢法政府已發給駐法之委使臣出境護照惟須俟委政府承認法國代辦使臣後方能復敦邦謹現法公使已離威京所有法國之利益均託美公使保護一切
覆電中謝○(德國)德皇大婚二十五年佳期接到各處致賀之電茲皆覆電中謝云

會議摩國問題近況○(摩國)各國代表員在阿塞斯拉會議摩洛哥國問題英員擬一面由列國議商一面由委員商酌警務事宜而德奧與毛國代表員均不以為然

威海交還緩期○(美國)倫敦消息云此次日俄之役俄國共賞英金二億四千萬磅英政府擬要求中國當按俄國或日本租借旅順之例展緩交還威海之期限故該地尚有十七年方到期限云

宮門抄

二月十五日禮部 太常寺 正紅旗值日 吏部引 見五十一名 繼祿因弟一等記名謝 恩 許澤新謝授缺 恩 直隸知府恩佑謝 恩 召見軍機 恩佑

上諭

二月十五日奉

上諭直隸大名鎮總兵員缺著王英楷補授欽此

批摺摘由

二月十三日

吏部奏升授內閣學士王埤應否仍留學政之任請 旨事奉 旨著仍留學政之任 又奏議覆閩浙總督奏高凌漢等調補福建福州府知府等缺事奉 旨准其調補餘依議 又彙奏歐陽鋈等補南甯府同知等缺事單一件奉 旨依議 又片奏庫大使增翰因迴避改掣近省事奉 旨依議 又彙奏各省試署人員期滿實授事單一件奉 旨依議 又奏知縣汪立元等親老告近事奉 旨依議 又奏各省丁憂等項人員彙奏事單二件奉 旨知道了 內務府奏查驗因案出 宮女子事奉 旨知道了 翰林院奏輪派翰林聽候 召見事單一件奉 旨知道了單留中 政務處二件

太僕寺摺察哈爾牧羣官兵賞罰由奉 旨知道了 工部片南運河歲修各工用過銀兩報銷由奉 旨知道了 二月十四日摺片十三件

張曾敷奏查明上年各屬田禾被災情形 另有旨 又上年辦理新漕情形 戶部知道 廷杰奏請繳裁缺總管印記 著照所請禮部知道 達桂奏 續採優枝 該衙門知道 又奏調舉行新政人員奉 硃批除傳蘭泰曹廣權現有本衙門要差均毋庸議外餘著照所議欽此 又補用同知張廷桂請免送部引見 吏部知道 又奏直隸州江士仁仍歸原班補用 吏部知道 又請以阮忠植升補延吉廳同知 吏部議奏 又奏審明傅詠調姦未成本婦羞

急自盡一案分別定擬 刑部議奏 又奏請以秋福豫補敦化令 吏部議奏 程德全奏海倫丞宋小源請開去底
缺以道員補用奉 硃批着照所請吏部知道欽此 又奏黑龍江設立鄉賢祠 著照所請該部知道 廷杰奏承德
守英醫病故開缺遴員護理 吏部知道

奏稿

太子少保北洋大臣直隸總督臣袁世凱跪 奏為直隸通永道要缺揀員請補恭摺仰祈 聖鑒事竊照通永道朱
家寶奉 旨補授江蘇按察使所遺通永道駐紮通州統轄四路廳永平府遵化州六屬三十四州縣地方遼闊政務
殷繁且綜理北運河道堤工關繫運道民生利病自修費核減以後工程倍艱係衝疲難最要題缺定例河道總督所屬
通永道該督揀選諸練河務者具題補授又各省道府如係奉 旨命往及督撫題明留于該省候補者無論題應
調應選之缺令該督撫酌量才具擇其相宜者悉准補用至題調要缺酌量以候補人員請補時該省如有截取
記名分發人員應先儘酌量請補如實係人地不宜始准聲叙以各項人員請補又道府直隸州知州遇應用候補時
先儘科甲出身人員請補查直隸候補道現無截取 記名分發人員其 特旨班道員中于河務均欠歷練惟查
有科甲出身存記候補道周學熙年四十二歲安徽建德縣人光緒十二年由廩貢生報捐郎中籤分工部是年八月到
部十五年十二月學習期滿引 見奉 旨准其留部十九年應順天鄉試中式舉人二十四年八月遵新海防例
報捐道員雙月選用二十七年任順直善後賑捐案內報捐不論雙單月分發指省山東試用九月到省二十八年度例
迴避改指直隸七月到直因辦理順直善後賑捐局保准歸候補班補用到省一年期滿業已甄別三十年五月臣以該員
操守謹嚴才力精敏附片奏保欽奉 硃批周學熙著軍機處存記欽此該員才識閱歷體用兼備現署天津道篆講
求河務上年南運河大汛認真督防安瀾獲慶以之請補通永道人地相宜洵堪勝任亦與例章相符合無仰懇
恩俯念員缺緊要准以存記候補道周學熙補授通永道俾資治理如蒙 俞允該道銜缺相當毋庸送部引
理合會同兼管順天府府尹臣張百熙順天府府尹臣陳璧恭摺具陳伏乞 皇太后 皇上聖鑒訓示謹
奏奉硃批著照所請吏部知道欽此

劉永慶片 再堰畝同知祁友蒙據報丁憂業經咨部開缺在案所遺印務查有河南截取同知程鴻遇明白諳練堪以

委令暫行署理除檄飭遵照並另揀合例之員 奏請補授外謹會同署兩江總督臣周馥附片陳明伏乞 聖鑒謹

奏奉 硃批吏部知道欽此

兵部謹 奏為遵 旨核覆北洋常備軍光緒二十八九年分收支餉雜各款併案覆陳恭摺仰祈 聖鑒事內

閣抄出北洋大臣直隸總督袁世凱奏北洋常備軍光緒二十八九年收支餉雜各款列為第一屆造冊報銷一摺光緒三
十一年八月二十九日奉 硃批該部議奏併發欽此又原奏常備軍二十九年度收支餉雜各款列為第二屆報銷
一摺光緒三十一年十月十五日奉 硃批該部知道欽此欽遵各到部隨據造具清單開先後咨送核銷前來
自應逐款核覆 一冊開解運車價一欸定例運送物件按六百斤給車一輛每車每百里給銀一兩等語此次冊報解
運軍衣靴帽帳棚等項每一千斤給車一輛每車每百里給銀三千文按時價銀一千一百文或一千八百九十文合
湘平銀一兩計每車斤數雖較定章有減而銀數過多兩相折算每車價值浮多約將一倍礙難准銷所有冊報光緒二
十八年分解運車價湘平銀六千七百一十七兩七錢九分八釐照例定價核給應除銀二千六百六十一兩五錢
九分八釐其餘四千零五十六兩二錢應准開銷又光緒二十九年分解運車價湘平銀五千三百三十三兩四錢五分
六釐照例應除銀二千四百四兩三錢九分一釐其餘三千二百二十九兩零六分五釐應准開銷統計光緒二十八
九兩年分併案覈算共准銷湘平銀七千二百八十五兩二錢六分五釐其浮銷銀四千七百六十五兩九錢八分九釐
應即刪除 一冊開買補馬價一欸查北洋奏定新章內開砲馬隊應需馬購買價值不能拘照舊章每馬至少須銀三
十兩上下又全軍馬匹每年每百匹准倒三十匹經臣會同政務處議覆在案此次冊報光緒二十八年分常備軍總
統馬弁及兩協七標共購馬七十二匹每匹價銀三十兩共請銷湘平銀二千一百六十兩馬隊八營砲隊三營輜重隊
一營共購馬二千一百八十一匹計共請銷湘平銀六萬五千四百三十三兩又倒補馬匹按每百匹倒三十四匹每匹價銀
三十兩內扣皮賊變價銀五錢每匹實支銀二十九兩五錢共計請銷湘平銀八千七百七十七兩八錢三分七釐又光緒二
十九年分購馬價值計共請銷湘平銀二百四十兩倒補馬價計共請銷湘平銀一萬九千九百六十二兩六錢五分核
與新章相符所有併案核計光緒二十八九兩年分買補馬價值統共請銷湘平銀九萬五千八百七十四兩四錢八分七釐
應准開銷 一冊開卹賞銀兩一欸查光緒二十八年分給過各營病故委員幫帶排長隊官文案司帳等八員每員均
給薪水銀三個月共請銷湘平銀五百十三兩惟該官弁委屬官階姓名均未指出曾否另案請卹無從檢查應令詳細

造報再行核辦又病故步隊正兵八十名各給燒埋銀十兩共銀八百兩惟冊內只有七十九名應銷銀七百九十兩其浮多十兩應即刪除又病故馬隊正兵二十四名病故砲隊正兵二名病故輜重隊正兵三名共二十九名每名各給燒埋銀十兩共銀二百九十兩統計共銀一千零八十八兩核與原定章程相符應准開銷又光緒二十九年分給過病故各營排長管帶等七員每員均給薪水銀三箇月共請銷湘平銀四百二十兩該官弁官階姓名仍未指出曾否另案請卹無從檢查應令詳細造報再行核辦又病故步隊正兵六十名病故馬隊正兵二十三名病故砲隊正兵十五名病故工程隊正兵九名每名各給燒埋銀十兩統計共請銷銀一千零七十兩核與原定章程相符應准開銷至該兵丁等既經給予燒埋銀兩不得再行請卹以杜重支計光緒二十八九年分併案核算應行查銀九百三十三兩應刪除銀十兩其餘請銷湘平銀二千一百五十兩應准開銷 以上統計臣部准銷湘平銀一十萬五千三百五兩七錢五分二釐行查銀九百三十三兩應俟登覆到日再行核辦刪除銀四千七百七十九兩八錢九分應令追款報部所有臣等併案核覆北洋常備軍第一第二兩屆收支各款緣由理合恭摺具陳伏乞 皇太后 皇上聖鑒謹 奏光緒三十二年正月二十五日具奏奉 旨知道了欽此

聖鑒事前據伊犁將軍長庚將伊犁辦理屯牧練軍動用經費兵部謹 奏為覈覆伊犁屯牧練軍報銷恭摺仰祈 聖鑒事前據伊犁將軍長庚將伊犁辦理屯牧練軍動用經費銀兩繕具清單造冊奏咨送部覈銷前來當經臣部以冊開運費保險電報匯費等款冊內間有聲叙查照前 覈銷或稱俯念外洋交涉仍照原單准銷等語查臣部檔冊因兵燹後均已遺失不全無從查悉行令該將軍即將有關此案應核應辦文件一一抄錄送部以憑核辦在案茲由該將軍馬亮將此案原奏清單原估清冊抄送前來自應逐款覈覆

一購買馬匹一款查冊開特古斯塔柳屯每屯兵一百名給馬十四匹計二屯四分共購買馬三十三匹六分又光緒二十六年牧廠購買孳生馬四千匹二共購買馬四千零三十三匹六分每匹支銀八兩共支湘平銀三萬二千二百六十八兩八錢核與立案相符其每匹給價銀八兩亦與伊犁馬價無浮應准開銷 一搬運長夫餉食一款查冊開漢洋槍步隊一營用搬運子藥公長夫三十六名每名月支銀三兩自光緒二十二年二月十三日成營起截至二十五年二月十三日止除小建十七日不支外共請銷湘平銀三千九百三十四兩八錢核與長夫應支銀數相符應准開銷 一購買外洋槍彈等項運費保險電報匯費路費車脚犒賞一款查冊開赴德國買過毛瑟步槍等共價德銀一萬五千馬自德國海口運至俄國森彼德堡海口運費德銀一千三百四十二馬共裝三百十二箱重俄稱一千九百五十八鋪特

自森彼德堡海口運至伊犁固爾扎每鋪特運費俄銀四盧布九十戈比共費俄銀九千三百四十八盧布十戈比外加保險每一百盧布收一盧布二十五戈比共保險費三百五十盧布續購克勞司刀頭一千箇自香港運至漢伯克費德銀一千馬克勞司槍礮共三批運費及備件運費共七萬一千六百五十馬又計大臣支發光緒二十一年十二月二十九日起至二十二年六月十五日止俄德兩館二十三電報費德銀一百七十九馬二十八分二十二年八月起至十月底止俄館六次電報及因阿拉圖省扣阻發電費俄銀三十三盧布二十五戈比每一盧布合德銀二馬十九分一釐五毫共合德銀七十二馬九十七分伊塔道由俄官轉電許大臣十二次每俄帖銀二十六兩八錢四分五釐迎提槍件委員由薩瑪爾 阿拉瑪圖七河巡撫電致許大臣電致伊犁甯遠城共五次費俄銀十四盧布七十七戈比阿瑪圖給送信人俄銀二盧布續購克勞司槍礮等件電費德銀九百五十三馬五十五分又由甘肅省商號匯寄呂大臣三次德銀共十九萬三千馬合重庫庫平銀六萬四千二百六十六兩五錢四分二釐每百兩匯費銀四兩共費庫庫平銀二千五百七十兩六錢六分又驗槍委員三次路費德銀七百六十五馬三十分迎提槍件委員一員隨帶兵二名由俄國薩瑪爾至阿拉瑪圖共十三台乘坐台車一輛每台車脚銀二盧布共二十六盧布押解槍彈俄國車夫頭二名車夫六十二名每名賞酒力銀二錢五分麵三斤每斤價銀一分米一石價銀一兩六錢羊四隻每隻價銀一兩車六十二輛每輛給馬料大麥一斗每斗價銀六分草四束每束價銀一分八釐共用庫庫平銀三十兩四錢八分四釐以上等項所用德銀俄銀及庫庫平銀不等折合湘平請銷共請銷湘平銀三萬五千六百二十五兩四錢二分六釐臣部按冊報每庫平銀一兩合德銀三馬四十分至三馬二十四分有奇不等每俄銀一盧布合庫庫平銀六錢五分七釐不等每俄帖一兩合庫庫平銀一兩三錢七分統計用德銀七萬五千九百六十三馬二十分俄銀九千七百四十盧布八十七戈比俄帖銀二十六兩八錢四分五釐庫庫平銀二千六百零一兩一錢四分四釐統計合庫庫平銀三萬四千二百五十五兩二錢一分七釐以一零四中合湘平與該冊請銷銀數相符其應支款目亦與鈔錄俄德奧和大臣原咨原訂相符應准開銷

一運解青鉛銅帽等項脚費一款查冊開青鉛四萬四千斤由喀喇沙爾運至伊犁計程一千七百十里每鈔百斤腳給脚銀五兩二錢六分一釐五毫共給脚價銀二千三百五十五兩六分銅帽洋火七百五十萬粒每千粒裝四盒重一斤四兩四錢由天津運至綏遠城計程一千三百八十里每千粒腳價二分又由綏遠城運至伊犁惠遠城計程七千一百四十里每千粒腳價銀三錢共給脚價銀二千二百五十兩按軍需例載運送軍火口內每一百三十

斤給車一輛每車每百里給腳價銀一錢五分口外給腳價銀四錢該冊所報支給運脚湘平銀共四千五百六十五兩六分核與定例有減無浮應准開銷統計此案戶部准銷湘平銀七萬六千三百九十四兩零八分六釐其餘支給新餉將種等項應歸戶部核辦購買農具軍裝等項應歸工部核辦所有臣等嚴覆伊犁市牧練軍報銷緣由理合恭摺具陳伏乞 皇太后 皇上聖鑒謹 奏光緒三十二年正月二十五日奉 旨知道了欽此

文苑

秦中

慶博如來稿

大周長安總奕棋登臨懷古不勝悲重墮一炬書燒後劉向傳經火盡時秦殿有魂空附樹漢家無跡認殘碑長城北築心機巧一騎南來又是誰

吳中

登臺覽古有新詩一夜西風短簿祠把酒臺應澆烈士吹簫窮竟困男兒舞衫歌扇吳姬曲水閣雲闌畫舫移蹤向滄浪亭子上濯纓歌到夕陽時

金陵

謫仙祠畔草蒼蒼此日樓臺古戰場龍虎幾朝餘葬地碑林一片認蕭梁南來泥馬是天數北顧太風歌帝王陸遜當年空自得至今祠廟祀關張

太白祠前望建康紫金諸嶺近斜陽一條大水從難挽六代編年竟不長地盛豈能消劫數天空誰爲弔興亡紀功碑裂傳翻本那及成都八百桑

荒碑那復記南唐草色蒼蒼亂夕陽寺改瓦官龍難珠懸樓閣爲誰光六宮學士皆兒女無福才人作帝王不盡秦淮河上水至今猶爲咽湯湯

潤州

過江人物去匆匆六代消沈賸梵宮有限碑文傳舊跡無窮江漢此朝宗北來燕子煙波外南渡河山落照中怪底眉陽老居士放懷先唱大江東

采石

六朝宮殿已雲平杯酒雙柑奠兩楹唐代河山憐後主李家人物只先生詩因崔顥甘停筆眼識汾陽豈是醒天地一身容不下五言低首謝宣城

揚州

不信阿廢好宴遊酒樓基址是迷樓歌傳李子分明兆飛去楊花未解愁春燕可憐皆物化暮鴉千古尙羈留繁華莫認淮河水暗向長江日夜流

瓊華占盡古今秋鳳舸曾停待御舟百萬生靈勞苦役一朝天子樂無愁臺前人鬼誰能辨鏡裏頭顏可自由太息玉鈎斜外燕年年春尙到邗溝

浙中

表忠遺石撫爛斑泥馬南來竟不還湖上歌聲新曲譜丸中人送舊江山三千鐵弩眞靈走十二金牌巧賜環直到而今遊岳墓西風蕭瑟雨潯潯

無端萬里懷長城一死翻全百世名孤塚不更南渡土傷心誰返向宮旌生前未展揮金志墳裏應聞罵檜聲太息黃龍來往客銀沙如雪弔荒營

戶部銀行代收國民捐清單

榮壽固倫公主 三百元 榮壽固倫公主之子誠毅毅勇公麟光 一百元 樂壽固倫公主之孫增愷 三十元
和碩恭忠親王四側福晉等 三百元 和碩恭忠親王之五格格 一百元 和碩恭親王福晉 一百元 和碩恭親王之嫡妾 六十元 吏部右侍郎張英麟 二千兩 吏部左侍郎李殿林 二千兩 吏部左侍郎繼祿 二千兩 繼祿之母尹氏 二百兩 繼祿之妻喜塔臘氏 二百兩 繼祿之女鉄格 五十兩 繼祿之妾王氏 五十兩 宿衛營統領趙國賢 二百兩 戶部文綬 一百八十七兩八錢 護目護兵一百二十名每名銀一兩 一百二十兩 孚王府溥仰之母 一百兩 宿衛營稽查營務廣增 一百兩 宿衛營號兵三十名每名銀一兩 三十兩 宿衛營護勇二十名每名銀一兩 二十兩 武清縣農民張金聲 十兩 廂紅旗副都統善豫 一百元 普豫之子格格憲靈等 五十元 頭等護衛鳳林合家 十二元八元 呂肇基 一元 伽藍寺僧可慶 一元 恭王

太監蕭得祿張得祿趙常順何得祥李連喜李連陞劉多福謝得喜 十元 恭王府太監李進祿五元 宿衛營文案
田沛 十元 宿衛營文案陳公錦 十元 護兵隊官李繼相 十元 護兵隊排長王連陞 六元 護兵隊排長
李玉春 六元 護兵書識謝振聲 二元 宿衛營司號長趙札洛 二兩 王志章 一兩 趙林 一元 趙承
魁 一元 顯應觀住持道劉誠真 十元 王玉珍 一元 馮鎮峯 一元 御茶膳肉各房庖掌榮成 一兩
程啓元 一兩 孫銘志 五元 孫銘志之母女媳暨孫汝海 五元 鑲白漢輕車都尉高崇恩 二兩 單治元
關家 一元 保陽武備學堂寶勳 拾五元 恭親王府首領李迎福 拾元 徐慶 拾元 王喜 拾元 孫德
慶 四元 回事譚順喜 六元 焦德海 六元 頭等護衛福泰 拾元 恩惠 拾元 文華 拾元 文啓
拾元 葉秀拾元 文志 拾元 明成 拾元 廣海 六元 二等護衛寶麟 二元 瑞森 二元 興文 五
元 雙喜 四元 恩英 五元 定溥 五元 德榮 五元 文鎧 五元 四品典儀長明 二元 世和一
元 三等護衛永順 三元 慶安 三元 振和 三元 寶賢 二元 李泰 三元 玉文 五元 趙榮 四
元 成林 三元 常永 二元 烏凌額 二元 福隆阿 二元 恭領德祿 三元 五品典儀常興 三元
黃福 二元 護軍 德祥 一元 恒忠 一元 玉溥 二元 宗洛 二元 周文 二元 連福 二元 德
喜 二元 松祿 二元 文益 二元 慶海 二元 親軍校慶齡 二元 勝啓 壹元 德春 壹元 榮
厚 二元 六品典儀玉林 二元 志福 壹元 榮瑞 二元 祁俊 二元 嵩志 二元 德祥 二元 李
興 二元 瑞昱 二元 文翰 二元 六品管領世隆 二元 驍騎校松秀 二元 廷蘭 二元 七品司庫
李順 一元 八品典興 一元 蘊和 一元 景福 一元 玉昆 一元 張福 一元 連興 二元 吏部
右侍郎增崇 二千兩 增崇之母章佳氏 一百兩 增崇之弟內務府郎中增德 一百兩 增崇之弟內務府員
外郎增祿 一百兩 增崇之弟婦子姪等共 二百兩 增宅家人馬銓閣家十一名共 拾二元 東恒肇當 拾
圓 西恒肇當 拾元 北恒肇當 拾元 當商劉禹臣 拾元 恒德當 四元 恒茂當 四元 恆興當 四
圓 恒盛當 四圓 利源當 四圓 祥源當 四圓 祥茂當 四圓 中和當 四圓 中興當 四圓 福和
當 四圓 中國通商銀行衆同人 二十圓 中國通商銀行經理人錢蔭堂 十圓 天源當四圓 以上共捐銀
九千七百七十五兩八錢龍圓九百六十七圓英洋三百零七圓銅圓四十枚止